

**Govor zamjenika predsjedatelja Zastupničkog doma Parlamentarne skupštine Bosne i Hercegovine dr. Denisa Zvizdića na Međunarodnoj konferenciji pod nazivom „Članovi parlamenata i vjerski lideri za mir i suživot“
Sarajevo, 12. veljače 2024.**

„Poštovani prisutni,
Dame i gospodo,
Uvažene ekscelencije,
Dragi prijatelju dr. Al-Issa,

Prije svega hvala vam što ste se na ovu konferenciju odazvali u ovako velikom broju. Svjedoci smo da, globalno posmatrano, ulazimo u izazovno desetljeće koje će donijeti velike geopolitičke, ekonomske, sigurnosne, društvene, demografske, okolišne, informatičke i brojne druge promjene i u kojem će biti uspostavljene jasne konture novog svjetskog poretka što će zahtijevati koherentnu strategiju – usaglašavanje različitih nacionalnih i regionalnih poredaka unutar dogovorenih pravila, općeprihvaćenih načela i ciljeva – i što je jednako važno – zajednički definiranih ograničenja u načinima i modelima djelovanja.

Ključni cilj je preventivno i pravovremeno djelovanje kako bi se izbjegli sukobi i sačuvao mir u svijetu. Da bi se to postiglo neophodno je da obnovimo međuvjerski i međucivilizacijski dijalog, na temeljima općeg dobra kao primarne vrijednosti koegzistencije, koristeći principe tolerancije i poštovanja drugog i drugačijeg čime se otvara prostor i stvara mogućnost za međusobnu saradnju i ljudsku solidarnost. Bosna i Hercegovina i Sarajevo nisu slučajno odabrani za organizaciju ove konferencije. Bosna i Hercegovina je poseban prostor gdje se prožimaju veliki svjetski civilizacijski i kulturni krugovi, mjesto gdje već 500 godina ljudi različitih religija i svjetonazora žive zajedno, prostor u kojem je bez obzira na historijska iskušenja sačuvana moralna supstanca i ideja zajedništva u različitosti.

Sarajevo, koje s razlogom zovu „evropskim Jerusalemom“ je ustvari sa svojom raznolikošću i svojom historijom svijet u malom i zaista smo zahvalni Njegovoj Ekselenciji dr. Al-Issa da je prihvatio da bude suorganizator ove konferencije i odabrao upravo ovo mjesto da pošaljemo poruke mira, tolerancije i saradnje. Budite sigurni da će zaključci i poruke sa ove konferencije će imati odjek u cijelom svijetu.

Također, ciljano smo u nazivu ove konferencije odabrali članove parlamenata i vjerske lidere kao ključne aktere u izgradnji mira i suživota i kao graditelje međuljudskih i međukulturnih mostova. Parlamenti su sa jedne strane, direktni predstavnici građana, oni su vox populi kojem su građani predali svoj suverenitet da ih zastupaju u donošenju ključnih odluka. Ali jednako su važne i vjerske zajednice, koje su predstavnici volje građana koji pripadaju nekoj od monoteističkih religija. Prema zadnjim istraživanjima 8 od 10 ljudi se u prosjeku izjašnjavaju kao vjernici. To je više od tri četvrtine svjetske populacije. To je glas koji moramo razumjeti i shvatiti. Zato na ovoj konferenciji želimo vidjeti kako članovi parlamenata i vjerski dužnosnici u saradnji sa akademskom zajednicom, medijima, državnim službenicima, organizacijama civilnog društva, mladima, međunarodnim organizacijama i privrednom zajednicom mogu uspostaviti saradnju i bolje razumijevanje. Ponosni smo na šarolikost koju nudi ova konferencija, jer Bog da nas je htio učiniti sljedbenicima iste vjere, on bi to učinio. Ali Bog nas želi iskušati upravo kroz naše različitosti, kako bi vidio kako ćemo se ophoditi jedni prema drugima. Zato iskoristite ovu konferenciju, razgovarajte, razmjenjujte mišljenja i iskustva, diskutujte i svi ćemo biti na dobitku.

Na kraju, želim vam poručiti da bez obzira kako se zovete, kojoj vjeri pripadate, ili koje uvjerenje slijedite, kojem narodu pripadate, koju ideologiju slijedite da pazite na riječ izgovorenu u javnom prostoru, jer zaista sa riječima sve počinje i završava. Riječ je najmoćnije oružje u rukama čovjeka. Jedan mudri čovjek je rekao: „Kod nepromišljenih ljudi um je na milost i nemilost njihovog jezika, dok mudar čovjek drži svoj jezik pod kontrolom uma“. I zbog toga pazimo na svoje misli jer postaju riječi, pazimo na riječi jer postaju djela, pazimo na djela jer postaju navike, pazimo na navike jer postaju karakter, pazimo na naše karaktere jer određuju i našu i tuđu sudbinu. Nelson Mandela je upravo

kad kaže da se „nijedan čovjek nije rodio sa mržnjom prema drugom čovjeku zbog njegovog imena, boje kože, vjere ili porijekla“. Mržnja se nažalost uči, a na nama je da prije svega kroz porodicu, pa onda i kroz sistem obrazovanja učimo našu djecu ljubavi i toleranciji, a ne mržnji i podjelama. Niti jedan čovjek nije ni po čemu iznad drugog čovjeka, a posebno to nije zbog svog imena, nacije ili vjere i jako je važno da to uvijek imamo na umu.

Hvala vam na pažnji i svima koji učestvuju na ovoj konferenciji želim sretan i uspješan rad! (kraj)